

学行典

學行典第二百四十二卷

篤行部名賢列傳十

明三 高信興 高才震

按昌黎縣志高信興高才震景泰三年各出粟米八百石賑濟有詔旌表其門

劉翔

按濟南府志劉翔字騰霄濱州人嘗掘地得金萬鎰弗以自私白有司貢于朝景泰三年歲荒又輸粟千餘石以賑饑民有司奏聞頒璽書旌獎

全以莊

按東鄉縣志全以莊新陂人景泰四年出粟二千石賜勅旌門

戴庸 趙賢

按巢縣志戴庸在城一圖人趙賢在城二圖人景泰四年各出穀一千二百石賑濟勅旌表其門六年又各上米四百石賑濟冠帶榮身成化四年趙賢復上米如數加正七品散官

高雲 何信 李綱 陳昇 吳貞 高寬 孫適 唐安 李宣 葉文謙 李谷佐

按六安州志景泰五年高雲等各上米四百石賑濟冠帶榮身

方恂 姜浩 李景 汪彥玘 趙贊

按巢縣志方恂在城一圖人姜浩在城七圖人李景柘臯鄉人汪彥玘添保鄉一圖人趙贊賢之弟
景泰六年各上米四百石賑濟冠帶榮身

吳思文

按灤州志吳思文字美華在城社人孝友勤儉自奉約而能急人景泰六年大水米貴文施粥半載
全活甚衆成化邊警廷議輸粟給官階富人盡避脫文慨助粟三百七十餘石上嘉其義給七品散
官不受壽至耄期孫吉登正德戊辰進士人以爲積德之應

王永年

按饒州府志王永年鄱陽人性仁厚能恤災周急不祈人報景泰七年郡大饑有司募民發粟助賑
永年傾儲得穀一千七百石輸官有司上其事以冠帶褒之辭不受太守黃堅高其義書句于廬曰

應詔能輸千石粟承恩留得萬年名

趙瑾

按無錫縣志趙瑾字公韞景泰乙亥饑疫人死者皆棄于野瑾乃買棺置之衢路縱取無所問有鬻田者匿其左券以搆訟而遺其券於道旁瑾所蓄犬遽銜至瑾前匿券者詣瑾謝不已瑾謂之曰本未嘗有券也人以此益義之卒年九十有一

董慧

按杭州府志董慧字如魯海鹽人景泰甲戌歲饑輸穀四百石成化癸巳海決民流又輸六百石丁酉大饑又輸千石其他置義田葺文廟掩骼建橋諸事未易枚舉

程宗德

按休寧縣志程宗德字宗遠文昌坊人初貧拮据負米養親義還清源客遺金二十兩家稍裕捐資修造萬安富來二石橋董千車田竹篠嶺古城于諸路又買河西渡舟備棺收葬冀州殍活常鎮饑民無筭景泰乙亥郡饑輸粟賜民爵一級立尙義坊

姚清 徐俊 石敬

按樂亭縣志姚清商家堰社人徐俊千金社人石敬黑崖子社人景泰壬申洪水民饑三人各輸粟八百石賑助事聞詔旌其門有司爲樹坊

王由

按温州府志王由字秉璠永嘉人倜儻仗義景泰閒章恭毅疏諫易儲逮詔獄刑鞫由適就選京師力爲周旋及歸復留十金併一僕以侍仍畀僕田四畝恤其家恭毅南還先造謝由而後歸舍所著有效齋集

秦誠

按南陵縣志秦誠號德滋資生嚴毅善治家產田業五萬有奇景泰閒應詔輸粟四萬石于通州授散爵郎撫按屢委以政事縣令王所瞻以事勸賑饑民慨諾不吝嘗建秦家橋光顧等橋

柴廣

按開封府志柴廣字文博祥符人誠實不苟與朋友約雖風雨必踐過文廟丁祭易服齋戒以往景

泰閒貢入太學始仕四川酆都令廉介有守縣無城池廣曰城池所以衛民也申請上司未幾工竣時土民趙鐸嘯聚倡亂勢甚熾廣率邑中壯勇之士以身先之遂擒首惡地方底寧擢知漢州修學校建輿梁均賦役政績著聞致仕歸築室陳橋北日誦內典施藥濟人埋枯骨飼幽鳥凡鄉人婚喪不能舉者率鄉之仗義共爲助之鰥居五十餘年室無婢妾弘治初巡撫海虞徐恪奏請旌表以勵薄俗壽九十七卒

孔彥懋

按句容縣志孔彥懋福祚鄉人宣聖五十九代孫慷慨尙義周卹貧乏景泰閒赴通州納米三百五十石以備軍需賜冠帶

凌溥

按句容縣志凌溥崇德鄉人兄弟九人同居合子姪千餘指共爨無閒言處鄉鄰一以義讓景泰閒出粟一千二百石以賑歲荒賜冠帶

范宗華

按青州府志范宗華諸城人景泰閒出粟一千五十石助賑勅旌獎爲義民

韓士名

按濟南府志韓士名利津人景泰閒縣修築城池闔縣修城三面而士名獨修城北一面人稱爲義士

馬麟 呂信

按盧龍縣志馬麟呂信俱本縣人景泰閒值水旱歲饑各輸粟八百石賑助詔旌表

曹義

按灤州志曹義字彥良柏家莊社人精星緯學景泰補天文生累官靈臺郎好義樂施弟姪無婚娶食粥之費者撫之乏牛馬者貺以助耕指揮高端有事金陵假百金未償義致仕歸見端恐恧因焚其券生童無資者助以衣糧紙筆年八十五卒

姚讓

按江寧府志姚讓字文敏上元人家世富饒讓勤儉樂施凡貧不能殯殮及流離無依者叩門告之

無不立應未嘗有難色橋梁道路廢圯者卽爲修葺街巷無井者輒計費開浚景泰間南雍志成出工價梓之至于自奉儉如寒士子弟服用及家人婚喪皆有常經未嘗妄費晚益勵儒術人傳頌之

趙慎

按句容縣志趙慎望仙鄉人景泰間燕民大饑奉例出粟四百石赴本縣官司交納以備賑濟給冠帶

林茂

按登州府志林茂棲霞人資雄一邑而性好施景泰年大祲茂賑粟千石是年子恂生建議民坊

方玘

按雲南通志方玘字公佩後衛指揮使弱冠時得遺金訪其人而還之景泰末年歲饑流離載道玘傾庾賑濟死者葬之卒年三十二妻曹氏以節稱

馬士權

按揚州府志馬士權泰州人善談論多氣節與大學士徐有貞善天順初石亨惡有貞下之獄謫廣

東參政慮其復起令人僞作疏毀謗朝廷假養病給事中李秉彝名上之逮秉彝訊不承亨等因譖有貞怨望使所親馬士權爲之捕有貞及士權下錦衣獄備嘗惡刑拷掠瀕死士權終無言會雷震承天門上大恐勅赦之編金齒爲民有貞出獄感其義以女許婚其子及亨敗有貞赦歸遂停其婚士權亦絕口不言

夏叔恢

按紹興府志夏叔恢嵎人天順初客越城中飲於酒肆時坐客被酒忘其囊去恢獲囊視之約五十金疾追其人弗及明日仍視于其處失金者叫號而來遂挈以畀之觀者莫不歎賞久之恢夢老人抱孩與之旣而得子雷領鄉薦

楊本立

按建昌府志楊本立捐貲數千助建郡太平橋太守謝名曰本立天順二年又捐米六百石賑饒州之荒詔立旌義坊

李剛

按鳳陽府志李剛天順二年輸粟賑饑恩賜冠帶詔許立碑記其事

張廷綸

按廣西通志張廷綸平南人天順四年進士時兩廣弗靖謀報某村落附賊參將范信列村落名欲屠者識以白圈否者黑當死者無慮數千人實皆良民綸以進士家居有以其事奔告者綸卽夜叩軍門告變信出見綸曰聞將軍欲翦屠村落耶曰然綸曰不可信拂然曰聞公剛腸疾惡今乃欲爲附賊地耶綸曰不然民實不附賊公無過聽且公奉天子命將弭寇以安民今乃誣民以爲寇民不死于寇卽死于兵等死且將從賊以苟活是驅民從賊也亂且勿戢信曰公敢保此曹果不從賊乎綸曰願以家族百口保之信大屈服立下令已其事且拜綸曰數千人死賴公而生信有死罪賴公而免敢拜公賜後爲南京戶部主事徑詣京奏巡倉御史罷官歸

蔣復春

按江華縣志蔣復春太平鄉人天順六年天旱納米四百石入本縣倉賑饑朝廷旌爲義民授七品承事郎散官

張善昭

按廣東通志張善昭字彥光順德人天順壬午舉于鄉試吏部高等授兵部司務大司馬余子俊甚才之超拜四川僉事以忤臺臣謫鳳陽通判轉臨江魏安生等八十四人隸尺籍皆練子寧肺腑善昭上言子寧忠貫古今太宗謂子寧在朕當用之昭帝亦稱方孝孺等爲忠臣旣忠之矣何肺腑外屬尙以奸惡配百年不宥哉乞復其家旣奏朝野壯之尋致仕初善昭計偕天順癸未南宮火友人劉琮死焉善昭旁皇數日于煨燼中得遺骸歸瘞卒業成均同舍趙蘭生窘且疫人莫之顧善昭頻視之蘭生垂絕叩枕謝曰螻蟻何足累君君自愛比再往已臥于地善昭撫其心尙溫也復舉于牀越數日愈明年蘭生登進士德善昭若父終其身焉善昭里居周厚本支及其鄉人居旁無甚凍餒者布政使劉大夏嘗單車遠訪善昭信宿乃去孫燦最知名

張思賢

按常德縣志張思賢武陵人正統間大水捐銀若干賑濟天順己卯大旱捐穀五百石又設粥道旁四方就食全活者衆監司奏聞授以七品散官建坊以表其門

周禧

按江寧府志周禧句容人天性孝友無子或勸納妾禧曰吾兄有子何用妾爲天順壬午自汴還有溺人觸舟旁急援入舟中灌以米飲乃甦詢知爲漁父遂返棹數十里訪還其家嘗寓京邸拾遺金十金翌日其人泣至尋覓禧審實還之毫不受謝又嘗商閩有誤與貨價十金者禧追還之行事率類此禧卒妻劉氏守節

顧真

按涿州志顧真興義屯人天順閒歲饑出粟四百石助官賑濟有司上其事旌表其門

張金三

按南陵縣志張金三北鄉人天順年間輸粟七百五十石賑饑民旌表

楊墳

按宛平縣志楊墳字景和善漆工天順閒錦衣衛都指揮門達恃寵驕橫凡忤之者卒受其禍同僚袁彬質直不屈乃誣以獄咸冤之莫敢發墳素不識彬遂擊登聞鼓上疏曰駕留北地諸臣咸奔散

逃生惟袁彬保護聖躬備嘗艱苦授職旌勞公論稱服今付獄拷掠罪定而後附律法司雖知其枉豈敢辨明乞以彬等御前審錄庶冤抑得伸疏入仍以彬付衛獄而達因是欲盡去其異己者乃緩塤死使誣大學士李賢指使塤佯諾之達遂以聞上命中官會三法司鞫於午門外塤乃直述所言於賢無涉達計不行而彬乃得降黜未幾英宗崩言者劾達罪舉塤事爲証達謫死南丹彬復舊職英宗實錄內有楊義士云

陳能鑑

按樂安縣志陳能鑑西村人天順閒于縣治前拾遺金候失主不至乃過袁昌茂門聞其哀哭知爲失金詢實而還之夫還金猶易而活命實難是咫尺之義而有丘山之恩士紳所以交頌之

方廷淮

按温州府志方廷淮樂清人家故貧與妻侯氏相愛敬攻苦茹淡日漸以饒乃自天順閒民饑捐粟二千石賜勅榮以冠帶孫召仕訓導杜門讀書手自抄錄至老不倦子五皆庠生

段子澄

按雲南通志段子澄太湖人爲諸生不納奔女道還遺金天順間秋試主司得其卷屢感異夢知爲端人急薦之任德安府判以內艱歸不復出居鄉益爲盛德事人謂爲太丘彥方之亞

熊敏信 兄敏忠

按崇仁縣志熊敏信號樂耕子泰幼成化初邑人繆希軾解府米銀八十兩飲市肆醉遺敏信繼至拾之默俟半日始歸軾至中途覺奔回長號欲自盡其仲兄敏文素善卜教軾向主家求之敏信聞之詢其故併詰其數驗得實罄囊還之軾願身以半堅謝不受一日隆寒行鄉曲遇二三小兒戲中一兒逐溺池中敏信隨衣履抱救時兒已不能言兒父返誣而執之敏信從容以救治之方少頃兒甦乃得白父母羅拜伏謝季兄敏忠嘗施棺助葬蓋亦好行其德云

陳明 管鑑 何文德 潘顯

按六安州志成化元年陳明管鑑何文德潘顯各上米七百五十石賑濟授七品散官

陸聰 葉文恭 李仲祥 高寧

按六安州志成化元年陸聰葉文恭李仲祥高寧各上米二百石授九品散官

周琮 子如堯

按郴州志周琮桂陽人隱居治生廣耕厚積饑年平價應糴復具飯以待其子如堯成化中輸粟十石詔旌曰義門御史范淵記之

謝福

按灤州志謝福長樂屯人儻疎財不拘小節成化中邊警勸富民輸粟福輸八百石以助國儲詔授七品階不受

丁浩

按無爲州志丁浩字士廣庶吉士毅之弟也性耿直讀書尙禮雅重節義家考澗以勤儉自力鄉族有稱貸者輒應其求平生濟患難助婚喪里人德之成化間歲大饑出粟三千二百斛又施粥以食無告者上聞遣行人旌表仍復其家今尙義坊在本鄉故里

戴春 方怡 姜永

按巢縣志戴春庸之子方怡恂之弟姜永浩之子成化元年各上米二百五十石賑濟授正九品散

官

張棟

按僊居縣志張棟字廷泰號閔耕性曠達無城府高尚邈世篤嗜佳山水肆意遨遊動踰旬月輕財恤貧乏邑中恃以舉火者數十家成化閒以例入太學甲辰陝西饑輸粟七千石佐賑之詔授宣議郎除工部主事不赴少隨父宦蜀歷瞿塘劍閣諸勝皆有詩名三巴遊草行世方伯蔡霞山刺史范伯軒爲作前後敘子表奇並博學有異才嘗稱爲張氏二龍云

何敬

按合肥縣志何敬字允恭謙謹和易刻厲向學成化閒歲薦家居每旦必衣冠拜天地祖宗以及先師端然危坐課諸生以孝弟爲本文藝次之任延平府知事卒於官旅櫬歸江中遇風舟楫欹斜內人撫棺泣曰天乎吾夫素行若虧宜遭此厄少頃風波頓息

張敞

按蘇州府志張敞字文理長洲人世居葑溪父灝字思本成化壬寅郡饑出粟賑濟縣令義之命董

治邑學廟灝竭心力趨事得賜章服敝承藉前規能自飭勵昧爽率傭奴操畚鍤趨田中力作課督
窳勤時藝耘耨咸有成法視他農歲倍入家用是大昌一鄉人舉以爲賦長他長鄉賦者每破產以
償官且多逋鄉小民咸病其多收獨敝所徵發常先期辦集郡縣大夫稱其才或舉疑事相質敝必
以正對有所委屬輒殫力爲之資費取諸家無少吝又善匿名迹往往事竟而人不知其德性至孝
父病疽創甚親自吮毒疽賴以痊事母薛夙夜靡懈痛父早歿每籲天虔禱曰使我母壽享百歲方
遂吾願旣而母果得百歲而歿敝年七十餘猶孺慕毀瘠祥除之後悲思不已遂遭疾卒敝居常日
手一編每對客必商論古昔名言懿則可以爲後人訓式者又勇于利濟妹寡而貧迎養於家里
有烈婦陸以節死敝禮葬之仍列其行於郡守胡纘宗命吏致祭其他死不能掩者賻之櫬槨旅櫬莫
返者齋之遣送親故以緩急赴告者無不如數應之建橋梁以利涉立義塾以廣教道遇遺金物色
其人還之仁心義舉大率如此太僕卿都穆作傳兵部主事袁表墓

胡浩源

按池州府志胡浩源成化二年大饑銅陵尤甚浩源積米五百石傾廩以濟不求知於上官人感其